

船山遺書

第卅五
函六冊

後序

述古繼天而王者本軒轅之治建黃中拒閒氣殊類之災扶長中夏以盡其材治道該矣客曰昔者夫子懲禍亂表殷憂明王道作春秋後儒紹隆其說董胡爲尤焉莫不正道誼絀權謀今子所撰或異於是功力以爲固法禁以爲措苟窮諸理抑衍而論其數雖復稱仁義重德化引性命探天地之素恐乖異乎春秋之度也曰何爲其然也民之初生自紀其羣遠其害沴擯其口口統建維君故仁以自愛其類義以自制其倫彊幹自輔所以凝黃中之綱緼也今族類之不能自固而何他仁義之云云也哉客曰宰制所謨以貽無疆固當通其變而不滯其常漢起西京中興洛陽子之所製定燕薊爲會同之邦不已固與曰王者相陰陽定風雨建之邦畿爲宰治主亦莫不用氣之厚而固自然之字也是故羲農之都或陳或魯平陽蒲坂安邑耿相憑河東北以爲安處長安洛陽大梁之士後王宅之數百年之下而後地力衰歇漸以薄鹵今燕薊之宅受命而興者女直韃靼曾不足於稱數永樂定鼎始建九五水土未薄天氣翕聚天子守邊四方來輔後之所宅固當

踵蹟靈區以光贊我成祖也客曰賢哲制未亂庸愚謀已然立說之大凡也今子所撰陳於數十年之前可以掇而保其堅方茲陸沈□□忽其斬焉過述先事之失爲期忌愆子所謂失魚而求筌也曰孔子著春秋定哀之間多微辭言之當時世莫我知聊愾寤而陳之且亦以勸進於來茲也昔在承平禍亂未臻法祖從王是爲俊民雖痛哭流涕以將其過計進不效其言而退必裁其身矣天下師師誰別玉珉荏苒首解大命以淪於是哀其所敗原其所劇始於嬴秦沿於趙宋以自毀其極推初弱喪具有倫脊故哀怨繁心於邑填膈矯其所自失以返軒轅之區畫延首聖明中邦作辟行其教制其辟以藩扞中區而終遠□□則形質消隕靈爽亦爲之悅懌矣歲德在丙火運宣也斗建維辰春氣全也文明以應竊承天也太原之系世胄縣也爲漢大行忠效捐也悲懣窮愁退論旃也明明我后逖播遷也俟之方將須永年也黃書之所以傳也意在斯乎

黃書

衡陽王夫之譔

原極第一

夫觀初始於天地者豈不大哉洋洋乎金以銑之木以幹之土以敦之火烜風撓水裊以烝化之彼滋此孕以繁之脈脈門門泮渙搏翕以離合之故盛德行於無疆而不知其屆也然而清其族絕其畛建其位各歸其屏者則函輿之功所以爲慮至防以切是故山禽趾疏澤禽趾羣乘禽力橫耕禽力縱水耕宜南霜耕宜北是非忍于其泮散而使析其大宗也亦勢之不能相掇而絕其禍也是故聖人審物之皆然而自畛其類尸天下而爲之君長區其靈冥湔其疑似乘其蠱壞峻其墉廓所以絕其禍而使之相掇故曰聖人與天地合德者豈虛獲哉夫人之于物陰陽均也食息均也而不能絕乎物□□之于□□骸竅均也聚析均也而不能絕乎□□所以然者何也人不自畛以絕物則天維裂矣□□不自畛以絕□□則地維裂矣天地制人以畛人不能自畛以絕其黨則人維裂矣是故三維者三極

之大司也昔者周之衰也誓誥替刺雅興鎬京淪東都徙號祭存綱紐佚詛盟屢私數圻日兼故抱器服而思烹漑者日惻惻然移玉之爲憂而聖人之所深長思者或不在此作春秋明王道內中夏外戎狄疑號者正其辜而終徠之外會者斥其賤而等擯之夫周之衰非有匈奴吐蕃契丹韃靼以爲之外逼也陸渾吾離允姓僑如之族種不能配中國之一名都也燕之北鄙秦之西陲未嘗晨夕於奔命也葵邱束牲而小白求三脊之茅城濮館穀而重耳干隧道之請周之玉步將上逼之爲兢兢而聖人終不以彼憂易此恤者則其故何也文武之興旰履牧率夕步天祚濫唐沿虞服夏禘商承建列侯各君分長山河塞隄際蠻戎夷貊者昔之天下也旣規規然惴其旁午復鼎鼎然虞其上下諸侯或僻介荒小用寡捍彊以小藩大勢詘于所守力僅于所爭固未嘗不糾迴蜿蜒於聖王之心夫廷萬國一君長挾尺捶而奔役四寓功施鉞鉞爛然開于共主而天下弗分其功名聖人豈異人情而不欲此哉然而山河以西師旦分牧函崙以東召奭代理五侯九伯州長連率經緯縫紼割制員幅者使之控大扶小連營載魄是故偏方遠服不受孤

警連城通國若運擘臂則周之盛王所以維繫神皋擯拒口類者意未有所弛而權不可得而衰夷厲而降牧長無命綱維潰破鋒矢尋於同仇牖戶薄於外禦是故孤竹蹙燕淮夷病杞鄭瞞義渠侮齊宋而窺河渭然而天子不能命伯列侯之彊大者矯激奮起北斥南征故斬令支轢卑耳拓西戎刈潞氏者猶赫赫然震矜其功以張赤縣之幟彼其左旋右攜夸武辟疆者雖不足以與聖王權衡三維裘領八極之盛心而聖人猶將登進之爲稍持其禍而異於漸滅也是以周之天子賜胙俎錫彤弓命隨會放黻冕賀任好播金鼓而不見譏於春秋故曰其事則齊桓晉文其義則某竊取之矣蓋進之也夫奠三極長中區智周乎四皇心盡乎來許清露零柯而場圃入保片雲合岱而金堤戒濫吳呼好冠而晉視命圭杞用夷禮而胄紕神禹莫不逆警萌甲而先靖宮庭是故智小一身力舉天下保其類者爲之長衛其羣者爲之邱故聖人先號萬姓而示之以獨貴保其所貴匡其終亂施于孫子須于後聖可禪可繼可革而不可使口類聞之然後植其弱掖其僵揚其潔傾其滓冠昏飲射以文之哭踊虞祔以哀之堂廉級次以序之刑殺征伐以

整之清氣疏曜血脈彊固物不干人沴不侵祥黃鐘以節之唱歎以瀏之故禮樂興神人和四靈集而朱艸醴泉相踵而奔其靈也今夫玄駒之有君也長其穴壤而赤虺飛蟹之窺其門者必部其族以噬殺之終遠其埜無相干雜則役衆蠢者必有以護之也若夫無百禩之憂眇九垓之辨尊以其身於天下憤盈儔侶畛畔同氣猜割牽役弱靡中區乃霍霍然保尊貴偷豫尸功患至而無以敌物偪而無以固子孫之所不能私種類之所不能覆蓋王道泯絕而春秋之所大慙也

古儀第二

自昔炎裔德衰軒轅肇紀閔阨危鑄五兵誅銅額滌飛沙弭刃於涿鹿之埜垂文鼓弦巡瑞定鼎來鷗鵲弼建屏萬邦而神明之胄駢武以登天位者迄於劉漢五姓百十有七后豈不偉與是豈有私神器以貽曾玄之心哉而天貺不捨靈光來集者蓋建美意以垂家法傳流雲昆不喪初旨羣眎蒸蒸必以得此而後足於憑依故屢濱播棄而卒不能舍去以外求宗主蹟其所以燾冒天下者樹屏中區閑擯殊類而止若乃天命去留卽彼舍此之際無庸置心要以衣冠烏帶之倫自相

統役奠維措命長遠醜孽者寶以爲符得人而遂授之然而帝眷民懷絲遊膠液紛紛延延彌保雲系者則貿于相求而隱于相報也迄于孤秦家法淪墜膠膠然固天下於擘握顧盼驚猜恐彊有力者旦夕崛起效己而劫其藏故翼者翦之機者撞之腴者割之貳人主者不能藉尺土長亭邑者不能橐寸金欲以凝固鴻業長久一姓而憤敗旋趾由此言之詹詹鑿陋未嘗迴軫神區而援立靈族豈不左與漢承其敝古型秦軌白黑兼半而彊幹植條爲數百年之計者亦自勗異意冥合十九侯王封君兼城占籍鑄兵支粟不爲禁戒故長沙可以支三粵之侵叛而燕旦受封制冊之中所以防遏獯鬻氏者三致意焉景武以還推恩少力耐金奪侯雖輒輔弱助而命大將遣軍使得以意行消息權制士馬而且金虎銅竹雖握禁闔軍民部署尤隆刺守故元成運替安順爽凌然而樓蘭郅支絕亢懸首烏桓羌部躡駕伏尸雖莽僭西都不奪許鼎而南陽益部連衍而接墜緒者猶此枵榆之苗裔也晉氏失計延非族以召禍亂中國隕隕非無自致而州牧分土長其君子其民措施不拔瑯琊以延向使泮散消弱守牧無資十六國之戎精悍非江

東之所能敵也六代文羸漫不足紀遺法餘力僅支江介者二百七十年使彼孱主孤邦日斤斤焉以孤寡陵遲倒柄藩牧爲慮曾不足以建十年而石苻拓拔已褰裳而絕安流矣是故天下之勢有合者有分者有張者有翕者有縱而隨者彊彼而固此者故曰大制不割樂天下之成而成之選天下之利而利之今夫柔鷺擊輯縱橫驅合于農則實去要愿朴建脆弱驅合于兵則名存名存實去則自忘其弱而喪其畛方且割萬有專己私侈身臂矜總持不縱以權不彊其輔則所以善役天下而掾其禍者蕩然無所利賴此仁者之悲膺疾頰而俗儒之利以爲名也唐無三代牧伯帥長之援無深仁大計建民固本清族類拒外侮之謀竊尸寓農之遺號強合兵農分制府兵徵發宿戎壹聽於京師此其法足以數世速亡而迄于天寶禍發始尅者豈府兵之敗軌特遲哉溯其僅存尋其利賴自西州沿北庭迄遼左置督護都督者不隨腹裏得專措置故一時大勳名將若李勣薛仁貴王忠嗣郭元振之流進止刑賞不受中覆選士馬審機宜滂沛椎酤奴隸偏裨下至乾沒猶無所問極重不返而節度逆行干天曆以成五季者事勢瀾流洄漩激

而反倒其歸也然且更迭閏位圖籙弈改石晉北傾恃怙蠢醜而并陽不拔胡馬
北首數閱而仍歸中國內彊之效亦可觀焉宋以藩臣暴興鼎祚意表所授不寐
而驚趙普斗筭菲姿負乘鉉器貢謀苟且肘枕生猜於是假杯酒以固歡託孔云
而媚下削節鎮領宿衛改易藩武建置文弱收總禁軍衰老填籍孤立於彊虜之
側亭亭然無十世之謀縱佚文吏拘法牽繫一傳而弱再傳而靡趙保吉之去來
劉六符之恫喝玩在廷于偶線之中而莫之或省城下受盟金縉歲益偷息視肉
崇以將階推轂建牙遺風漸滅狄青以樞副之任稍自掀舉苟異一切而密席未
溫嫌疑指斥是以英流屏足巨室寒心降及南渡猶祖前謀斬循僅存于貨酒岳
氏遽隕于風波撓棟觸藩莫斯爲甚夫無爲與者傷之致也交自疑者殊俗之所
乘也卒使中區趨靡形勢解散一折而入于女直再折而入于韃靼以三五漢唐
之區宇盡辮髮負笠漸喪殘剛以潰無窮之防生民以來未有之禍秦開之而宋
成之也是故秦私天下而力克舉宋私天下而力自詘禍速者絕其胄禍長者喪
其維非獨自喪也抑喪天地分建之極嗚呼豈不哀哉夫石守信高懷德之流非

有韓彭倔強之質也分節旄攔鎮牙非有齊秦百二剖土君民之厚實也談笑尊
豆兵符立釋非有田承嗣王武俊李納之跋扈而不可革也使宋能優全故將別
建英賢顛倒奔奏星羅牙錯充實內地樹結邊隅一方潰茂聲援谷響雖逮陵遲
取資百足亦何至延息海濱乞靈潮水皋亭納璽碭島沈淵終使奇渥吞舟乾坤
霾塞濱百年而需遠復哉惟其塗蔽萬民偷錮大器瓦缶之量得盈爲歡嬰兒護
餌偃鼠貪河愚夫之惑智者哂焉易曰其亡其亡繫於苞桑苟有繫也足以固矣
而必於苞桑焉秦宋之繫於苕枝而不知其根之拔也故曰前事之失後事之師
其來茲之謂與

宰制第三

今欲取天下而宰制之有聖人反三維起在位度不十數傳復有□□□□之等
夷狡焉思裂維而盜神器如□所爲彼固狃以爲故常無足難也而天下亦恬不
知所怪天地之氣相干淩矣亦或羸槁不能爲人掾聖人堅擘定趾以掾天地之
禍非大反孤秦陋宋之爲不得延固以天下爲神器毋凝滯而盡私之故易曰聖

人之大寶曰位何以守位曰人何以聚人曰財非與于貞觀之道言亦安足以窮其辭哉天地之產聰明材勇物力豐庠勢足資中區而給其衛聖人官府之公天下而私存因天下用而用天下故曰天無私覆地無私載王者無私以一人治天下此之謂也今欲宰制之莫若分兵民而專其治散列藩輔而制其用今之自縣以上三進而及布政使司凡以治民者自秦而下不能易也縣隸府府隸司司受命於天子足以曄響無關格之疾矣府治其屬既不能專其有事旁撓于同判推官而巡守兵備安坐其上以扼郡邑之呼吸則分司之建可革也山東府六而分司者十六山西府五而分司者十三陝西府八而分司者二十四四川府九而分司者十七或倍之或參倍之其佐倖遇府設焉或稍浮于府未有一道而兼制數府者也所以束溼纏繫于知府者可謂急矣而一郡數邑不得以制其短長之命旦夕不測其民視牧長如逸兔之於驚鷹也況其爲天子守疆圉取必而與城共命乎魏尙之於雲中李廣之於隴西以一郡捍匈奴之名王者事權重而戰守專也故革分司重府權盡治其郡設推官以贊其吏治立武監以簡其兵賦兵賦所

講受成於府有所徵發府受臺計而遣之刑名錢饌駟置屯田水利奏最于兩司足矣夫撓郡權而臨其上者不過治府緒之餘而形隔勢礙推委以積其壞是龐睫儻耳無益于視聽而益損其官也自郡上之爲民之治者受於司爲兵之治者請仍巡撫使之任而去其京銜定其鎮地制其戾塞重其威令僉其勁銳閒其文武假其利資七者具修以置藩輔各戰其境互戰其邊行之百中以意消息中國可反漢唐之疆而絕孤秦陋宋之豐禍也中區之地西戰用文河山用武沙衍耐騎箐峒耐步江海耐舟麥食耐勇稻食耐智雜食耐勞廣土墳爭崟崎壁守鹵國給鹺澤國給積澇鄉給魚赭山給鑄林阜給莽邊徼互馬殷道課關其它連錫絲枲筋鱧皮革蒲篠硝黃翎毛杉枋岡桐栟櫚漆林苧絮之所產者可相輸而各奏其利大司農不登之書非中監漁採則豪猾墨吏兼并閭右之所攘也一切取足其瘠疲不耐給者百之四五故曰利資可假勁銳可僉戾塞可制也請置河北山東爲一使江北濟南爲一使河南荆北爲一使燕南河東爲一使關陝秦隴爲一使荆南江右爲一使江南福浙爲一使巴西瀘南爲一使南贛嶺海爲一使嶺西

桂象爲一使滇黔洱海爲一使此十一區者用武地六用文地四兼錯犬牙率得險者或十六七或十三四因舒蜿蜒隨原隰各固其圉取材其產蒐其軍實以聽邊關之不時畿輔爲一使左輔爲一使右輔爲一使大同爲一使延綏爲一使寧夏爲一使河西爲一使此七區者戰地十九內地十一大司農因漕委輸轉十五司之粟米以灌注之滑州襟帶黃河右腋太行左腋鉅野臨制河南之膺膈一要區也河北山東行臺治之其地起大名北有廣平順德南有彰德衛輝封邱延津陽武原武東得東昌濟南東傳于海得益都臨淄樂安博興壽光昌樂臨朐高苑又東得登萊極于海西得懷慶潞安澤沁扼太行窺冀晉傳于山洛陽據土中左京索右潼關三塗岳鄙神明之區也河南荆北行臺治之其地起河南東北得汝州開封許禹鄭之屬邑窮于滎澤東南得南汝南得襄鄖承德西南得興安平利石泉洵陽紫陽白河漢陰濱漢沔閒滢消承楚脊控關南東固汝水放于淮徐州憑黃流睨大江披帶長淮東枕瑯琊咽鬲南北一要區也江北濟南行臺治之其地起徐州東南得鳳陽淮安南得廬州安慶黃州滁和盡于江東北得兗州安邱諸

城蒙陰莒州沂水日照北阻大峴東傳于海西得歸德太康陳州商水西華項城
沈邱窮于汝潁之交原以故晉之墟左山右河北阻忻代士馬勁疾險障重沓
一要區也燕南河東行臺治之別治晉陽別嫌藩司形勢無相互格其地起陽曲
太原榆次太谷祁徐溝清源交城文水壽陽孟靜樂平定割鴈奉以爲大同守西
南得汾州平陽遼州西畫河南不盡太行以壯澤潞東出土門歷常山得真定彌
互絡繹以承右輔之或羸咸陽居渭流之北與長安相望秦川八百關河沃衍之
區也關陝秦隴行臺治之別治渭北別嫌藩司形勢無相互格其地起西安北盡
北洛界梁山西南得鳳翔漢中寧羌之屬割興安畀河南爲右腋西得鞏昌阻陰
平鎖蜀漢北得平涼華亭鎮原崇信涇州靈臺安化合水寧州眞寧狄道渭源慶
洮平涼諸邊之劇邑割實邊藩爲所保守有秦川供三邊之奔命又西得岷洮北
阻蕭關西戒河湟以司茶馬之居儼又西不盡于生番武昌長江東下清漢南來
雄挽中流搏蠻中引江外一要區也荆南江右行臺治之治故鄂城別嫌藩司形
勢無相互格其地起武昌逾江得漢陽阻潁水南得岳州長沙衡陽安仁衡山鄱

縣未陽常寧訖南條西南踰洞庭得荊州辰常泝于沅有黎平平溪清浪迄于偏
鎮中括施撒永定永順保靖兼漢土西又南得邵陽新化分瀘水爲南塞東得南
昌瑞州九江袁臨饒廣南康包彭蠡有江右之衍區諸挾嶺爲閩廣脊受無賴者
割以爲南贛守鎮江因京峴緣揚子西接漢岷北拒淮泗漕守山東俯拾建業一
要區也江南福浙行臺治之其地起鎮江得蘇松常州廣德西上夾輔應天沿江
得寧國池太東有徽州倚三天子鄣沿漸江東有全浙循海而南得福泉興化福
寧渡江北直海門狼山鎖大江得揚州盡淮東罄折江海索腴賦休士馬輝戈船
根抵南國以備倭盜而資山東之奔命合州三江所會魚復焚道褒駱武都嚴道
夜郎之所奏而會一要區也巴西瀘南行臺治之其地全有四川自威茂雜谷天
全黎印昌跨大渡度相嶺右遶東川烏撒烏蒙界水西盡轄土夷南渡烏江得平
越東北上得清平興隆思南石阡思州銅仁窮五塞南盡于沅贛州咳頤梅關延
紆嶺塞注瀉海嶠絡引大帽剎頭東鄉之條紀武備所嚮樓船步卒之衝一要區
也南贛嶺海行臺治之其地起贛州南安西得郴桂臨藍嘉禾盡楚獠地北得吉

安東北緣山有建昌撫州故盜區數下杉關得延平邵武建寧南迤汀漳窮于海
次海濱得惠潮廣州蔓引連陽與臨桂會而西盡于灘水之交梧州控肘楚嶠垂
臂瓊海是灘潭牂牁灑江之下遊逆邀其所趣土漢噤喉之要區也嶺西桂象行
臺治之其地起梧州東得肇慶窮于灘口東南得羅定高州雷廉南極交趾濱于
海渡海得瓊西泝三江全有廣西北越秦城放湘源得永州武岡城步新寧靖州
通西延古泥之徑尋左江西上得都勻犬牙楚黔界于播夷大理葉榆所派金滄
所維北捍土蕃南覆撾甸六詔上游之雄徼一要區也滇黔洱海行臺治之其地
全有雲南竝夷部東逕縣度出箐道得貴州西境東有貴陽訖乎新添北緣陸廣
赤水烏撒而界于瀘南沿平伐鎮寧頂營募役鑿初道以通乎泗城而西南窮于
交趾于是登其甲乘制其刑典宅其賞罰司其汰補寬其蹤指要其連系盜賊踞
山谷汎洋汎者府自部討之聞于臺盜名城躡旁邑暨小夷之竊發臺部討之聞
于司馬邊徼奔命巨寇彌延羽書馳于司馬下檄臺使因其形勢奔走疾疇以膺
其鄰左勞逸腴瘠搏隘勁脆以視其往來滑臺涉鉅鹿通天津以紆左輔徐州沿